

Uunga siunnersuut: Inissianik attartortitsisarneq pillugu Inatsisartut peqqussutaata allanngortinnera pillugu Inatsisartut inatsisaat nr. xx, xx. xxx 2022-meersoq

(Ineqarneq pillugu Maalaaruteqartarfiup pisortat inissiaatileqatigiiffiit il.il. aalajangiisinaatitaanerata annertusitinnera)

(Ineqarnermut Attaveqaasersuutinullu Naalakkersuisoq)

Saqqummiussissut

(Ineqarnermut Attaveqaasersuutinullu Naalakkersuisoq)

Siullermeerneqarnera

Inissianik attartortitsisarneq pillugu Inatsisartut peqqussutaata allanngortinnerneqarnera pillugu Inatsisartut inatsisissaattut siunnersuut, Naalakkersuisut sinnerlugit matumuuna saqqummiuppara.

Namminersorlutik Oqartussat kommunillu nalinginnaasumik inissianik pilersuinerini inissiat attartortittakkat ilaasut aaqqissuunneqarneri, ukiuni kingullerni allannguuteqarsimasut Naalakkersuisut ilisimalerpaat. Taamaattumik attartortittakkat arlaqartut Ineqarneq pillugu Maalaaruteqartarfiup piginnaatitaaffiit siunertaangitsumik ilaatinneqarsimangillat.

Ineqarneq pillugu Maalaaruteqartarfik attartortitsinermut inatsit naapertorlugu maalaaruteqartarfittut nammineertut aamma arlaannaannulluunniit attuumassuteqanngitsut pilersinneqarnikuvoq. Suliassat pissusiviusumik suliarineqarnersut imaluunniit itigartinneqassanersut, Ineqarneq pillugu Maalaaruteqartarfik nammineerluni aalajangiisarpoq. Naalakkersuisut maalaarutip pissusiviusuni suliarineqarnissaanut itigartitsinissaq imaluunniit suliarinninnissaq imaluunniit maalaarutini aalajangersimasunik aalajangiinissaq pillugu nalinginnaasumik imaluunniit aalajangersimasunik ilitsersuutinik Ineqarneq pillugu Maalaaruteqartarfimmut nalunaarutiginnissinnaangillat.

Taamaattumik inissiat attartortittakkat, Namminersorlutik Oqartussat kommunillu nalinginnaasumik inissianik pilersuineranni ilaatinneqartut, aaqqissuusaaanerannik allanngortitsinermut, Ineqarneq pillugu Maalaaruteqartarfiup aalajangiisinaatitaaffiit naleqqusaanissamut, attartortitsinermut inatsisip allanngortinneqarnissaa pisariaqarpoq.

Siunnersuutigineqarpoq Ineqarneq pillugu Maalaaruteqartarfiup pisortatigoortumik aalajangiisinaatitaaffii allanngortinneqassasut erseqqissarneqassasullu, taamaalilluni maalaaruteqartarfiup Namminersorlutik Oqartussat, kommunit imaluunniit Namminersorlutik Oqartussat kommunilluunniit aalajangiisutut sunnuteqarfigisaani inissiaatileqatigiiffik attartortitsisuullutik, attartortitsisup inissiamik attartortittakkamik piginnittuunera

apeqqutaatinngu, inissiat attartortittakkat pillugit attartortup attartortitsisullu akornanni aaqqiagiinngissutaasut suliarisinnaalissallugit.

Siunnersuutigineqarpoq Ineqarneq pillugu Maalaaruteqartarfiup aalajangiisinnaatitaaffii annertusitinneqassasut aammalu inissiat toqqaannartumik imaluunniit toqqaannangitsumik Namminersorlutik Oqartussat kommunillu nalinginnaasumik inissianik pilersuineranni ilaasut aaqqissuunneqarneranni pissusiviusuni allanngortitsinerup malitsigisaanik erseqqissarneqarlutik. Taamaaliornerlu attartortut pisinnaatitaaffiik pitsangorsaanissamik tunngaveqarpoq.

Erseqqissaatigineqassaaq, Inissianik attartortitsisarneq pillugu Inatsisartut peqqussutaanni (attartortitsinermut inatsimmi) allannguutissatullu siunnersuummi matumani attartortup attartortitsisullu akornanni pissutsit kisimik malittarisassiuunneqarmata. Inissarsiortunut attartugassanngorlugit pisortat sanaartortitsinerinut, pisinerinut, inissianilluunniit attartortittakkanik attartornerinut inatsisitigut tunngavissat attartornermut inatsisitigut, allannguutissatullu siunnersuutitigut matumuuna malittarisassiuunneqanngillat.

Taamatut oqaaseqarlunga Naalakkersuisut sinnerlugit immikkoortoq Inatsisartuni suliassanngorlugu tunniuppara.